

Barúwa ya Paúli kwa Vafilípi Mulongooryo

Barúwa kwa Vafilípi yaandikwa ni mutumwi Paúli. Viintu ^vyoónekanaa, Paúli aandika barúwa iki kati ya myaaka ya 60-62 keende Kirisitu ^avyaalwa. Aandika barúwa iki, hamwi na barúwa ya Vaeféeso na Vakolosái mpingi ^ajaa manyololwii uko muiji wa Róoma (Vafilípi 1:13-14). Paúli aandika barúwa iki kwa vaantu ^vamura Yéesu va muiji wa Filípi (1:1). Vafilípi vajaa vooneka kweenda kukaulu kwa Paúli ko matwaarira nyambirira ya viintu ^asaakaa (4:10-19).

Paúli aandika barúwa iki, sa avaduumbe Vafilípi sa nyambirira yaavo. Kei asaakaa avawiiire ^vyeene aarya Masáare Maaja kura manyololwii (1:12-18) baa koofa kuulawa tuku (1:20-24). Barúwii iki, Paúli avaheera mitima Vafilípi vandookikiimia na isi ja Yéesu (2:1-12). Avakalaamia kari vatuube ukiindya wa Vayahúdi ^mweene wiilangyaa kutwaalwa na kibawii tuku, kari vyo mwiinamira Muluungu kimutima (3:2-3). Ukiindya uhu, ni mavi kwa masalaba wa Yéesu (3:17-21).

Paúli avaheera mitima Vafilípi vave na cheera, noo kusea, vandoomadumba Muluungu siku joosi. Na kwa kira kiintu, kari vyo kiitirikira, vandoomalomba Muluungu, kuna voomadumba (4:4-6).

^Vyeene Kitáabu iki Chagavwa

Paúli yoomudumba Muluungu na yoovaloombera Vafilípi 1:1-11

Paúli na uturikiri waachwe uko Róoma 1:12-26
Mwiikalo wa muntu akundikaniwa na Kirisitu 1:27-2:18

Timotéeo na Epafuradíto vootamwa na uko Filípi 2:19-30

Uwoloki wa kikomi na ukwaata 3:1-21

Kumudumba Muluungu na kvaheera matima vara vamura Yeesu 4:1-23

Lumbi

¹ Barúwa iyi yafúmire kuri nini Paúli na Timotéeo, vatamami va Kirisitu Yeesu. Toovaandikira nyuunyu vaantu va Muluungu mwakundikaniwa na Kirisitu Yeesu, mwiikalaa múujii wa Filípi baa na viimiriri vaanyu na vaambiriryi vaanyu.

² Nduwo na mwiikalo mwa fuma kwa Muluungu Taata wiitu na kwa Mweenevyoosi wiitu, Yeesu Kirisitu, jive na nyuunyu.

Paúli Yoovaloombera Vafilípi

³ Noomudumba Muluungu waani kira mpiindi ndiri vakumbukira nyuunyu.

⁴ Kira siiku namulóombaa Muluungu ndiri na cheeru sa nyuunyu voosi,

⁵ sa nyuunyu mwaava vaambiriryi vaani vo kaarya Masáare Maaja keende siku ya ncholo furu isiku.

⁶ Nini namányire kikomi, Muluungu yeeye aanda mrimo mwa mitimii yaanyu, kuukiimikirirya ari mrimo uwo siku ira Yeesu Kirisitu ari kaja.

⁷ Ni uwoloki nini kwiiririkana jei sa nyu-
unyu, sa ni mutimii waani muri. Mwahókeraa
nduwo ya Muluungu hamwi na nini mpiindi
^ndiri manyololwii na mpiindi ^naviviriraa na
noonekyaa kikomi cha Masáare Maaja.

⁸ Muluungu amányire ^vyeene naveenda
manumamu na ^vyeene ndiri na mpiima ya
Kirisitu Yésu kuri nyuunyu.

⁹ Kuloomba kwaani ni uku, moongererye kwi-
iyenda nyuunyu kwa nyuunyu, na mave na tooti
na manyi,

¹⁰ sa mudahe saawula viintu vira ^vyabooha.
Aho, kuva muri uteréere, na vaantu si
^vang'urirwaa furu siku Yésu Kirisitu ^ari
hinduka,

¹¹ kunu mwamémire ndiwa ^jifúmaa kuri
uwoloki ura ^ufúmaa kuri Yésu Kirisitu sa
nkongojima na dambi kwa Muluungu.

Murimo wa Paúli Manyololwii

¹² Haaha noosaaka vanaviitu mataange yara
yoosi ^yafumira kuri nini, ayo yaambiriirye
kwaarya Masáare Maaja.

¹³ Sa jeyyo, valukaluka voosi va mutemi Kaisári
na vaantu vingi voosi va aha, vatángire nachu-
ungwa sa namutámamiraa Kirisitu.

¹⁴ Na sa kuvikwa kwaani manyololwii,
vaaniitu ^vari foo vamutámamiraa Yésu Kirisitu
Mweenevyoosi, viitémire kulusa isáare ra
Muluungu baa woowa tuku.

¹⁵ Kimaari, vamwaari vamwi ^voovariyula
masáare ya Kirisitu kwa kivina na wiitóoli. Baa

neembe ni jeyyo, vamwaari viingi ^vaváryulaa kwa wuuja.

16 Ava vatámamaa jeyyo kwa mutima wo kweenda, na vamányire niini mwaari kunu manyololwii, sa nduuse Masáare Maaja ya Yéesu ni kikomi.

17 Maa kaa, avo ^vari na kivina, vaváryulaa masáare ya Kirisitu kwa miryungu iyo sa vadumbwe ni vaantu. Voovo voosaaka koongererya uturikiri waani mpindi iji ^ndiri manyololwii.

18 Baa jeyyo, che kisáambukire? Laanga, masáare ya Kirisitu yoovariyulwa, ive ni kwa mutima muvi au kwa mutima wa kikomi. Sa kintu iki, niini tuuba ndiri kuvyeenda.

Hii, tuuba ndiri kuvyeenda,

19 sa namányire kwa kulusika kwaanyu na Mulungu na kwa nyambirirya ya Mutima Muja wa Yéesu Kirisitu, lamuririwa ndiri.

20 Ni kiilaangya niise, si ndiri koona soni kwa njira yoyoosi tuku. Tuuba ndiri kwiitema na Kirisitu tuuba ari bweyyiriwa nkongojima muvirii waani, ive ni kwa nkaasu au kwa inkwya.

21 Sa kwaani, kuva mooyo ni kamutamamira Kirisitu na kukwya ni kúnáalo.

22 Kooni ndiri tuuba kuva mooyo muvirii uhu, tuuba ndiri tamama murimo uri na kúnáalo nkulu. Si nootaanga nsaawule kirikwi tuku. Kwa mooyo baka kukwya.

23 Viintu ivi viviri vyookuunduta. Noosaaka ndooke, nkiikale na Kirisitu, na ivyo noo vya-booha maatuku vii.

24 Maa kaa, sa nyuunyu, ni vyabooha nchaale ndiri mooyo muvirii uhu.

25 Isáare iri ni ra kikomi, sa jeyyo, namányire kuva ndiri mooyo hamwi na nyuunyu, sa mukule kwa kura kuruma kwaanyu na muvyeeende kumuruma Yéesu.

26 ^Ndiri kuva hamwi na nyuunyu, kuvyeenda muri maatuku vii sa Kirisitu Yéesu kuva ari aanyámbiriirye niini mpinduke na kwaanyu kei.

27 Kiintu kikuulu, mwiikalo waanyu uve ja ^vyeeene Masáare Maaja ya Yéesu Kirisitu yalusa. Na kooni ndiri kuja no valaanga au kooni si ndiri kuja, nkindooteera na nkindootaanga mwatuuba kiima neeja, muri na muryungu umwi na muri mutima umwi, kanu mookiisiinda sa kuruma kwa Masáare Maaja.

28 Kari mandoovoofa vavi vaanyu tuku, maa kaa, mwiiteme. Ihi koonekya iri kari voovo ni tamanya viise noo malwa, maa kaa, nyuunyu lamuririwa muri ni Mulungu.

29 Sa nyuunyu si mwaheewa nduwo yo muruma Kirisitu vii tuku, maa kaa, baa nduwo yo turikiriwa sa yeeye.

30 Ayo ^moolwa noyo, noo ayo baa niini ^naalwijaa noyo, ja ^vyeeene moona. Kei baa haaha teera mwiise mwaari nootuuba kulwa noyo.

2

Kwiikiimya na Isi ja Kirisitu

1 Eri, mwiikalo waanyu wo va kiintu kimwi na Kirisitu vaheera wiise mutima wuu? Eri, kuvyeenda kwaachwe kuvatuurya kwiise mitima wuu? Eri, ni kiintu kimwi muri na Mutima Muja wuu?

Laangwa mwiise kwa riiso ra wauja ni Kirisitu wuu?

² Kooni viri jeyyo, kumbweeyya muri nive na cheeru munumunu kwa nyuunyu kuva na muryangu umwi, kweenda kumwi, kuva kiintu kimwi mutimii na kuva na tooti imwi.

³ Kari mundoobweeyya kiintu ko viihya inda tuku. Kari mundookiivaa kipeembe tuku. Maa kaa, mwiikiimye na isi, kira muntu yoomanyemya wingi na moovoona vingi vabooha kulookya nyuunyu.

⁴ Kari kira umwi waanyu indoolaanga masáare yaachwe vii tuku, maa kaa, kira umwi waanyu andookiiririkana kuvaambirirya vingi.

⁵ Miiririkano yaanyu ive i'ira Kirisitu Yésu ajáa noyo.

⁶ Yeeye baa neembe ufumo waachwe ni Mlungu, si oona kura kuva Mlungu, ni kiintu cho namatira tuku.

⁷ Maa kaa, iibweeyya ja kiintu kisiina, aava ja mutumwa, avyaalwa ja muntu.

⁸ Akave na ufumo wa muntu, akiikiimya na isi, akaruma kukwya, inkwya yo vairirwa misamáari masalábii.

⁹ Sa jeyyo, Mlungu amwiinula munumunu, na amheera irina ralooka marina yoosi.✧

¹⁰ Sa kwa irina ra Yésu, kira kiúumbe kurumwii na kari weeru na Ntarii, kichwaame mbere yaachwe,

¹¹ na kira lurimi luhuse, Yésu Kirisitu ni Mweenevyoosi,✧

✧ **2:9** Laanga Vaeféeso 2:21; Vaeburanía 1:4. ✧ **2:11** Laanga Isáaya 45:18-23.

kwa nkongojima ya Muluungu Taáta.

¹² Vijeengi vaani naveenda munumununu. Haaha, ni matu mujáa kuri niini siku joosi mpindi ^nijáa kwaanyu na baa mpindi ^ndiri kuli na nyuunyu. Viivyo tuubi kutumama viintu ^vyoónekyaa Muluungu avalamurirya, kanu mookoofa no tetema.

¹³ Sa ni Muluungu ^yootumama isii yaanyu, yeeye noo yoovaheera mpima na ngururu yo tumama yara ^meene yoosaaka yatamamwe.

¹⁴ Tumami viintu vyoosi baa kung'uula no kwi-iruta ndihi tuku.

¹⁵ Mave vaana va Muluungu, si mung'urirwaa na musiiina wvi. Kei mave vaantu ^musiina lukwaalo, mpindi iji ^mookiikala kati na kati ya vaantu va haaha ^vamema wvi na ^vasaambuka. Kati na kati ya avo vaantu, nyuunyu mave ja kiweeru ^kimurikiraa weeru.

¹⁶ Kei mukwaatye isáare ra nkaasu, sa siku Kirisitu ^ari hinduka, niiteere mwerere sa marimo ^natumama ko manyika kuri nyuunyu, na noone si natirikira bweete tuku.

¹⁷ Baa kooni nkaasu yaani yootoolwa ja mpóryo ya choonywa mweeri ya mpóryo ya kuruma kwaanyu, niini na cheeru ndiri, na navyeéndire hamwi na nyuunyu voosi.

¹⁸ Viivyo nyuunyu moosaakwa muvyeende na mave na cheeru hamwi na niini.

Luyeendo lwa Timotéo na Epafuradito

¹⁹ Haaha nookiilaangya Yéesu Kirisitu Mweenevyoosi kooni ari vyeenda, matuma ndiri Timotéo siku ^jookuuja aha mbere, uje

na kwaanyu, sa ^ari hinduka, neeriwe mutima ni saare ja mwiikalo waanyu.

²⁰ Sa niini nsiina muntu wiingi ^avalangaa ja yeeye tuku.

²¹ Wiingi ni volwa vii na masare yaavo, na si yara ya Yeesu Kirisitu tuku.

²² Maa kaa, nyuunyu veeneevyo mwamanyire kikomi ^vyene Timoteo ima neeja. Yeeye atumamaa na niini murimo wo varyula Masare Maaja ja mwaana na taata waavo.

²³ Haaha kiilaangya niise nimutume na kwaanyu chaangu, ^ndiri taanga vii ^cheene kiri fumira kuri niini.

²⁴ Naani nookiilaangya kuri Yeesu Mweenevyoosi, rekerwa ndiri, na kuuja ndiri na kwaanyu siku jiji vii ^jookuuja aha mbere.

²⁵ Nookoona ni vyabooha nimutume Epafuradito na kwaanyu. Yeeye ni mwaaniitu ^amuruma Yeesu, kei ni mutumami na mulwi nkoondo mwiiwaani. Na nyuunyu mwamutuma ji aampeere nyambirirya mpindi iji niini ^noosaaka nyambirirya.

²⁶ Ni kumurekera niise ahinduke sa atiite mpiima maatuku vii yo voona, na kei avisula ^akataange nyuunyu mwateera ajaa alwaala.

²⁷ Kimaari ajaa alwaala kende akwye. Maa kaa, Mulungu amulaanga na riiso ra wuja na si yeeye vii tuku, baa niini, sa ndire kuvisula mweeri ya kuvisula.

²⁸ Sa jeyyo, noo ^chooreka noomanyika kumutuma na kwaanyu, sa ^muri moona kei muvyende. Na niini nseyyiwe kuvisula kwaani.

29 Muteengyi na cheeru, sa yeeye ni mwii-waanyu kwa kura kumuruma Yésu Mweenevyoosi, na muntu ari ja yeeye, mundaomanyemya.

30 Yeeye ajaa asengerera kukwya sa mrimo wa Kirisitu. Yeeye ajaa avika nkaasu yaachwe nemwiinemwii sa afikye nyambirirya ng'eene nyuuny mwasiindwa fikya sa viintu mwiikalaa kuli.

3

Kumuruma Kirisitu noo Kwaréetaa Hwoloki

1 Haaha ee vanaviitu, vyeendi kuri Yésu Mweenevyoosi. Nini si ndiri katala kuvaandikira masáare yara nahumula kuvaandikira tuku, sa masáare ayo, kiimirira yari kumuruma kwaanyu Kirisitu.

2 Laangi neeja ijo kúri, vatamami vavi, vara vakwaatya kutwaala vaantu na kibawii.

3 Sa suusu tamwiinamiraa Muluungu kwa Matima wa Muluungu, suusu noo kikomi tatwaalwa na kibawii. ✧ Suusu twiivaa kipeembe sa Kirisitu Yésu na tamwiiláangyaa. Suusu kwiilaangya kwiitu, si kuri kuri maviri tuku,

4 baa neembe nini ndiri daha kwiivaa kipeembe sa masáare ya maviri waani. Kooni muntu yoyoosi yookoona atiite nteendo ja maviri jo kiivaira kipeembe, nini nadaha munamunu.

5 Nini natwaalwa na kibawii mpindi njaa na siku inaani vii. ✧ Nini ndiri Mwiisiraéli fuma lukolo Iwa Bénjamini, na ndiri Mweeburania wa

✧ 3:3 Laanga Varúumi 2:28-29. ✧ 3:5 Laanga Ncholo 17:12.

Vaeburanía. Ko kwaatya Miiro, nîni nijáa ndiri Mufarisáayo.

⁶ Nîni namanyikáa maatuku vii kutumama yara ^niiseáa noo Muluungu eenda, na sa jeyyo, naturikirya mpuka ja vaantu ^vamura Yésu maatuku vii. Na kuri uwoloki ^utóorekaa kwa Miiro, nijáa si nang'urirwáa tuku.

⁷ Maa kaa, yara yoosi ^noonáa ni kunáálo kwaani, haaha nooyavala ni mukube sa Kirisitu.

⁸ Na si ayo vii tuku, haaha nookona masáare yoosi ni mukube ^ndiri yayaanirirya na kunáálo nkulu munumunu yo mataanga Kirisitu Yésu Mweenevyoosi waani. Sa yeeye, napata mukube wa masáare yoosi, na nayavala ayo ja kosu sa nimuturye Kirisitu,

⁹ na nkundikaniwe ne. Nîni si noosaaka noonekane uwoloki ja ^vyene Miiro yasea tuku, maa kaa, nive uwoloki ko muruma Kirisitu. Kwalwa uko, kwafúmaa kwa Muluungu na ni ko muruma Kirisitu.

¹⁰ Nîni noosaaka nimutaange Kirisitu na ngururu ya kufufuka kwaachwe. Noosaaka nive kiintu kimwi uturikirii waachwe, na noosaaka ni ifwaane ne inkwyii yaachwe.

¹¹ Aho, siku iyo, nive umwi wa vaantu vara Muluungu ^ari vafufula.

Kuyimirirya Furu Kherererya

¹² Nîni si noosea nahumwîre turya ayo tuku, au nahumwîre kiimaniwa tuku, maa kaa, nootuba manyika sa nturye kira ^cheene Kirisitu Yésu aankwaatira.

¹³ Vanaviitu si noosea nahumula kwaatya ayo tuku. Maa kaa, nootumama kiintu kimwi, nareka

kwiiririkana yara ^yalooka, na noomanyika kufikira yara ^yari mbere.

¹⁴ Mwaari noomanyika kukurika sa nfikire kira kilungulungu cha kurumwii cho siinda ^cheene Mulungu yootwaanirira ko tweera kuva kiintu kimwi na Kirisitu Yésu.

¹⁵ Sa jeyyo, suusu ^twiima neeja kari kumuruma Yésu, tasaakwa twiirumire masáare aya. Na kooni mookiiririkana ^viisimire, Mulungu vakunukarira ari kahon'ya kwaanyu.

¹⁶ Kiintu cho kwaatya haaha, toosaakwa tu-tube mwiikalo wiitu ura ^mweene Mulungu ahumula kutoonekya.

¹⁷ Vanaviitu, moosaakwa mündootuubirirya mwiikalo waani. Kei moosaakwa mündookiikiindya kwa vaantu ^vatúubaa mwiikalo wiiswi, sa mutuubirirye viviraviviira mwiikalo waavo.

¹⁸ Sa ja ^vyeene nahumula kuvawyira isáare iri ^kari foo, na haaha ni hindukira niise kuvawyira na miisoori yookiika miiswii yaani. Ni kuvawyira niise, vaantu ^vari foo mwiikalo waavo ni ja vavi va musaláaba wa Kirisitu.

¹⁹ Kukiimikirirya kwa vaantu ava ni imalo, mulungu waavo ni inda jaavo, na nkongojima jaavo ni viintu vya soni, na miiririkano yaavo ni viintu vya weeru.

²⁰ Suusu miitu ni kurumwii kwa Mulungu. Na suusu toowoojera na mpiima kuhinduka kwa Malamuriri wiitu Yésu Kirisitu Mweenevyoosi fuma kurumwii.

²¹ Yeeye kwa ngururu jaachwe valandula ari miviri yiitu ^iri teketeke, na ibweeyye yiifwaane

na muviri waachwe wa nkongojima. Kwa ngururu jiijo, vika ari viintu vyoosi vive isi ya wiimiriri waachwe.

4

¹ Haaha, vanaviitu, nini ndiri na mpima maatuku vii yo voona. Nini naveenda maatuku vii. Nyuunyu ni cheeru chaani, na itaaji raani ^naheewa sa murimo ^natumama. Haaha mwime neeja kari kumwiilaangya Yeesu Mweenevyoosi.☆

Ufairiri wa Paúli kwa Vafilipi

² Noovakalaamya Eudía na Sintíke vave kintu kimwi. Sa viintu muri va Yeesu Mweenevyoosi, marikiryi kudiira kwiiteerwa kwaanyu.

³ Nookuloomba weewe ^uri mwaaniitu wa kikomi ^tutumaman'yaa, uvaambirirye avo vaantu vaki vaviri sa vandookiiteerwa. Avo vaviri vamanyikaa maatuku vii kutumama hamwi na nini, mpiindi ^tavariyulaa Masáare Maaja. Vatumamaa hamwi na Kileméenti, na vatumami viingi voosi. Marina yaavo yamwaari kitáabwii cha nkaasu.☆

⁴ Ivi na cheeru siku joosi, sa mwakundikaniwa na Yeesu Mweenevyoosi, kei ivi na cheeru.

⁵ Kuhola kwaanyu kutaangikane kwa vaantu voosi. Mweenevyoosi ni heehi ari.

⁶ Kari mwiiturikirye kwa kintu chochoosi tuku, maa kaa, kwa kira kintu, ilombooli na muloombi Mulungu kunu moomudumba. Vira viintu ^moosaaka, vitwaali vitaangikane kwa Mulungu.☆

☆ **4:1** Laanga 1 Vatesaloníke 2:19. ☆ **4:3** Laanga Wiivariyuli 20:11-15. ☆ **4:6** Laanga Matáayo 6:25-34.

⁷ Na mwiikalo muija wa Muluungu ura ^walooka miryungu yoosi, laangirirya uri mitima yaanyu na miryungu yaanyu kuva iri kiintu kimwi na Kirisitu Yésu.

⁸ Haaha vanaviitu, kiintu kimwi cho kiimikirirya, mukwaatye masáare yoyoosi ya kikomi, masáare yoyoosi ^yanyémiwaa, masáare yoyoosi ya uwoloki, masáare yoyoosi ^yari uteréere, masáare yoyoosi ^yeendwa, masáare yoyoosi ^yarumwa ni maaja, kiintu chochoosi ^chaboohaboocha na kiintu ^chasaakwa kidumbirirwe, ivyo noo mwiindookiiririkana.

⁹ Masáare yoosi ^mwiikiindya fuma kwaani, au ^mwahokera au ^mwateera au ^moona fuma kwaani, yatumami. Na Muluungu wa mwiikalo muija, kuva ari na nyuuny.

Paúli Yoodumba Kisaanga cha Vafilípi

¹⁰ Natiite cheeru kuri Yésu Mweenevyoosi, sa kei mwaándire kiiririkana sa niini. Kikomi mwaanjiririkanáa, maa kaa, mwasiindwáa turya nkalo yo kunyambirirya.

¹¹ Si noolusa jei sa nasírurwe tuku, niini niiki-indya kwiikinkima na viintu ^ndiri novyo.

¹² Niini namányire kusirirwa na namányire kuva na viintu ^viri foo. Nijuvira kwiikinkima mpíndi joosi, nive níkutire au nive na njala, nive na kira kiintu au nive nasírurwe.

¹³ Nadáhaa tumama yoosi, kuri Mweenevyoosi ^aampéeraa ngururu.

¹⁴ Baa jeyyo, mwabweeyya vyaboocha maatuku vii kunyambirirya mpíndi ^natirikiráa.

¹⁵ Nyuuny Vafilípi mwamányire, siku ja ncholo ^nkaande variyula Masáare Maaja kwaanyu, na

mpĩndi ^nafumáa isi yaanyu ya Makedonía, ni nyuunyu vii noo ^mwaanyambiriryáa. Ni mpuka yaanyu ya vaantũ ^vamura Yéesu vii noo ^yaampeeráa kisaanga. Kusiina mpuka yĩngi ya vaantũ ^vamura Yéesu ^yaampeeráa nyambirirya ya kisaanga tukũ.

¹⁶ Baa mpĩndi ^nijáa múuji wa Tesaloníike, mwaantũmĩra nyambirirya baa si kamudu vii tukũ.

¹⁷ Si noolũsa jeyyo sa noosaaka mutuube kũampeera nyambirirya tukũ, maa kaa, noosaaka nkindookoona ntálarya ^ng'eene Mũlungũ yoovaheera sa kũboohya inda kwaanyu.

¹⁸ Haaha vira viintũ ^mwaantũmĩra kwa njira ya Epafuradíto, navihokera. Natĩte kira kiintũ ^noosaaka baa na kũlookya. Nyambirirya iyo, yavĩre ja mpóryo ^iri na irĩra ^rabooha na ^yaramika na ^imweéryaa Mũlungũ mutima.

¹⁹ Na Mũlungũ wiitũ, vaheera ari kira ^muri saaka kwa usúngaati waachwe wa nkongojima ko va kiintũ kimwi na Kirisitũ Yéesu.

²⁰ Mũlungũ, Taáta wiitũ wa kurumwii, abweyyiriwe nkongojima kwa siku ^jisiina uhero! Kikomi.

Masáare yo Kiimikirirya

²¹ Nuumbiryi vaantũ voosi va Mũlungũ vara ^vari kiintũ kimwi na Kirisitũ Yéesu ^vari uko Filípi. Vaaniitũ voosi ^vari na niini vavalúumbiirye.

²² Vaantũ voosi va Mũlungũ vavalúumbiirye, na hasa ava ^viĩkalaa kaayii kwa mutemi Kaisári.

²³ Nduwo ya Yéesu Kirisitũ Mweenevyoosi, ive mitimii yaanyu. Kikomi!

Rangi **Rangi Translation Project (New Testament)**

copyright © 2023 Wycliffe Bible Translators, Inc.

Language: Rangi

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 7 May 2025 from source files dated 8 May 2025

f1dc5da6-bc39-5ea5-ac13-942132b5feb6